



Nor Sam wanita kedua terajui Jabatan Pertanian

Mahani Ishak - November 16, 2023 @ 12:23pm

mahani@bh.com.my

KUALA LUMPUR: Timbalan Ketua Pengarah Pertanian (Pengurusan dan Regulatori), Datuk Nor Sam Alwi dilantik ketua pengarah baharu jabatan berkenaan, wanita kedua diberi tanggungjawab memegang jawatan nombor satu agensi di bawah Kementerian Pertanian dan Keterjaminan Makanan itu.

Jabatan Pertanian dalam satu kenyataan, memaklumkan pelantikan Nor Sam, 57, lulusan Ijazah Sains Pertanian dari Universiti Putra Malaysia (UPM), berkuat kuasa semalam.

Watikan pelantikan beliau disampaikan oleh Ketua Setiausaha Negara, Tan Sri Mohd Zuki Ali, semalam.

"Pelantikan beliau dibuat berdasarkan prestasi dan pengalaman luas di Jabatan Pertanian di samping pengetahuan serta kredibiliti beliau dalam pembangunan sektor agromakanan untuk menerajui jabatan," menurut kenyataan berkenaan, hari ini.

Wanita pertama diberi tanggungjawab sebagai Ketua Pengarah Jabatan Pertanian ialah Datuk Khamsiah Mohammad yang menerajui agensi itu selama setahun bermula 2004.

Nor Sam pernah bertugas sebagai pegawai kuasa usaha bahagian teknikal pertanian, selain Pengarah Pertanian Perak dan Pengarah Bahagian Pembangunan Industri Tanaman Jabatan Pertanian.

Jawatan ketua pengarah agensi terbabit kosong mulai 26 Ogos lalu selepas penyandanginya, Datuk Zahimi Hassan bersara wajib.